

101135

037

416

常唐詩稿

自署錢

雪庵詩稿

雪庵詩稿序

雪庵學棣。遊星洲。卅餘年。去歲書來。謂家世讀書。不欲及身。而泯泯無聞。閒輒吟詠。得詩若干首。將付梨棗。乞一言爲序。余維晚近。故家子弟。多唾棄先業。自詡開明。如雪庵者。志足尙矣。余未竟讀雪庵集。雪庵之造詣若何。不能盡知。要可於雪庵之言。知其梗概。雪庵曰。我詩以言志。自抒性靈。不主宗派。不泥成法。興之所至。率爾成篇。時而抑鬱悲愁。時而酣嬉暢適。是殆自立門戶。不屑倚傍者歟。雪庵簡傲性成。疏慵任放。於古詩人。孟襄陽爲近。余聞古詩人。儘多胞與爲懷。關心時世。雪庵跡滯炎荒。飽經離亂。凡戰爭之殘酷。人世之瘡痍。都爲囊錦。不僅一己之遭際。爲足述也。山川之險阻。關塞之廢興。隨處文章。不僅當前之風景。爲足紀也。雪庵倘能以大詩人。杜少陵爲宗。則詩當益進矣。

一九五七年瓜秋繡伊李禧撰於古白鷺洲夢梅花館

雪庵詩稿序

雪庵孫世南。居廈門。世書香。弱冠南遊。從事教育。時余亦在是。得結識焉。陳紫杖先生。與君戚誼。因以女綺珠配之。杖擅詞翰。名馳南島。君親炙其間。益見精進。求書者踵接。乃訂潤例。以節其勞。君任工商學校。凡十數年。成就頗多。迨日寇南進。星洲變爲昭南。乃挈眷屬避居吉里門島。蓋繼室李孔雀。該處人也。隱於山中園內。負耒躬耕。有如梁孟。余時亦避亂。或相過訪。雞黍留飯。如入桃源。致足樂也。及世界和平。重蒞星洲。孔雀病逝。悼亡篇什。可擬元九。後從商懋遷。頗有收穫。能師能商。可見其才略。今周華甲。已了向平之願。環顧兒孫而樂之。乃檢平昔所作詩篇。纂而輯之。將爲紀念品。出示於余。覺得洋洋大觀。成一巨製。計千有餘首。不下十萬言。余以似此繁重。印費孔多。不如提菁擷華。便於諷詠。易於流傳。令人欣賞。不亦愈乎。統閱大著。詩品清新。詩筆流利。不高格調。自寫襟期。將來出版。閱者自能會心微笑。故不多贅。因爲之序。

丙申秋日星洲市隱洪鏡湖甫草

雪庵詩稿序

從姪雪庵。幼失怙恃。幾失學。遣其出就外傳。旋進學校。先後受業吳秀人李壽禧柯伯行諸先生。頗自奮。喜讀詩。未有作也。弱冠。隨余之馬來爪哇。考察華僑教育。識陳紫杖先生於星洲。紫杖與雪庵父。爲諸生時。相友善。同爲葉小谷先生婿。雪庵事以父執。甚恭。余歸。雪庵留。與紫杖益稔。紫杖精岐黃術。懸壺有年。暇則吟詠自遣。聞雪庵知詩。喜。以長女妻之。雪庵又得外舅指引。詩益進。女亦能醫。有淑德。不期伉儷正敦。而雪庵賦悼亡矣。悲愁抑悵。往往寄懷於詩以自解。續絃後。中日戰起。故里淪胥。星洲繼陷。共受簸遷之苦。乃鯨鮪甫靖。又鼓盆歌。雪庵一再傷情。憂深家國。其哀感悲吟。以洩其胸中之壘塊。胡能自己耶。雪庵飽經憂患。窮矣。所爲詩。何敢以窮乃益工自期。而其如怨如慕。纏綿悱惻之忱。時隱顯於詞氣之間。令人閱之。不免生無限之感慨焉。雖然。雪庵年已杖鄉。有子有婦。有女有孫。天倫樂事。詩史娛情。往事可無念矣。今者文明大啓。世運方亨。雪庵益養其氣。安詳典重。待作和聲。以頌時雍。當更大其用也。丁酉仲秋。二十五叔印川氏。書於鷺江味古書室。時年七十五。

自序

予少好遊。然足未嘗出戶。民八秋。挾行李。涉重洋。過星洲。轉爪哇。而入蘇門答臘。足跡幾逾千萬里。遊於是乎始。其間浮屠古剎。名山大川。園囿宮殿。無不寓目。知夫風光之美。興廢之感。在在皆詩料焉。而予苦未能詩。亦惟置之。民十三年春。既成婚矣。與吾丈日相處。丈固能詩。每有佳作。輒獲先睹。愛其詩。清澹不凡。始稍稍習之。後有吟作。頗自私藏。積數十首。竟不自知其爲詩也。未幾痛結臍之中摧。燈孤影寂。騷愁滿腹。然後而爲詩。以成千百首。蓋不特籍筆墨爲遊戲。亦聊以寫吾懷。貽兒輩作舊賬觀耳。孔子曰。詩言志。區區之心在此。非所望於藏名山也。編纂既藏。不能自己。書以爲序。

雪庵識於星洲夢梅仙館

雪庵詩稿

思明雪庵孫世南編纂

陳紫杖公墓誌之銘

吁嗟陳公。是我岱宗。治家有道。克儉以躬。才高學邃。儒釋兼通。寡言訥訥。豪詠自雄。寬宏雅度。守節持中。提携後進。秉仁爲衷。惠施志趣。博愛大同。星洲巫吉。馬鬣是封。有集行世。傳諸無窮。高山景仰。先生之風。

雪庵自傳歌詞

嗟吾此身。歷年風塵。炎荒投竄。將成貊人。半生碌碌。無所知名。倏倏自潔。與世無爭。坎珂頻阨。長作書奴。前車可鑑。勿再糊塗。空懷彩筆。難邀換鵝。新詩數卷。搔首吟哦。鍾期不遇。莫奏鳴琴。漪歟綺兮。遠棲山林。隨予素願。漫笑顛狂。率性安命。壽保無疆。顏淵陋巷。未聞怨窮。瓢食無餒。力持以躬。景行先聖。存真見吾。束裝囊載。高隱蓬廬。樂我妻孥。黍稷是謀。以時以牧。歲稔豐饌。婚嫁已畢。詩肩無虞。扁舟一葉。浪迹五湖。

戲擬小築六首三十六韻

雪庵拙笨。與世無緣。遙思南畝。輒懷歸田。光陰閃爍。佇企有年。詎知今日。買山構榑。剪茅結屋。珊來亞邊。離市不遠。步約三千。前臨江水。迤邐封蛇。沿流葱翠。髣若碧紗。上跨喬木。晚繫漁槎。儼如處士。

逋仙之家。依欄下釣。竿垂手叉。驕陽西落。滿載魚蝦。
左植蔬果。丹紫青黃。荷鋤耘種。曝背朝陽。瓜肥蕉熟。摘充飢腸。佳賓雅集。
肴酒共嘗。形憊神倦。席地爲牀。閒招稚子。說海荒唐。
右盡橡樹。縱橫成林。紅塵不染。境更堪欽。雲清月朗。乘興豪吟。萬籟皆寂。
祇聞蟲音。天怒氣鬱。風厲雨靈。澗聲乍響。庭絕飛禽。
後象雞毘。任殖孳繁。養生獲給。時節開樽。妻孥逕坐。促膝談論。承歡色笑。
團樂克敦。扉雖嚴設。晝常閉門。狡獪守舍。盜潛無痕。
晨耕夜息。身似許由。呼課兒女。挑漿補修。斬荆伐棘。倚枕細籌。菜擷洗縛。
待旦銷售。勤勞吾體。寧敢自謀。用貽梅鶴。駿展宏猷。

題南山喬木圖詞

南山崔巍。喬木森森。孤撐獨立。不怕風侵。葉茂張蓋。蔚蔚參參。勿翦勿伐。
終必成林。安得斯願。惟有同心。預爲企祝。佇盼濃陰。

祭吾婦李孔雀文三十二韻

維卿質慧。樂善好施。慈祥愷悌。昆明咸知。和霽樂衆。穆穆揖熙。芸芸僑庶。
同氣連枝。誘掖後進。擷領提撕。相君式度。佐業成基。里鄰睦睦。長幼無私。
羣黎欽仰。心悅神怡。鍼神絕技。名匠稱奇。雲裳裁剪。萬口皆碑。遠賓驟至。

撮黍重炊。宰牲摘韭。綠醴盈卮。挑漿顧曲。周郎癖癡。吟哦楊畔。擊節詠詩。暴寇侵擾。逃匿山陂。舉家星散。手足分離。忙碌辛苦。耘種豆箕。關藜伐棘。儲糧充飢。勤勞晨夕。體弱難支。率爾罹疾。稽延莫醫。淹淹數月。魂飛魄馳。薄棺三寸。長瘞玉肌。破襦故服。未愠非儀。寬懷就道。與艸迤邐。有子遙隔。亡來斬蓑。孰爲扶櫬。祇吾相隨。天人異處。耿耿退思。悠悠瞑目。永別丰姿。留予飄泊。撫卹諸兒。深慚負德。盟踐不移。戔戔鰥楮。粲納弗辭。清樽再奠。聊灑悽其。

漫吟

嗟彼勞人。紅塵僕僕。營營攢攢。不能滿慾。勞瘁弗辭。朝慮夜續。誰知到頭。閃爍結局。黃土一坏。牛羊躑躅。秋墳盈盈。芳艸綠綠。宵深露凝。隨風飄逐。名士紅顏。幾時磅礴。偃臥隴邱。猿啼螢燭。留彼騷人。憑弔嗟愕。迺知緇塵。此起彼落。忽縮忽伸。乍榮乍辱。興衰有時。未能長沃。奚須紛爭。終難欣矚。是是非非。彌思彌曲。不如隨願。任吾所欲。

祝工商周刊週年紀念

富庶而教。聖訓昭彰。文明普被。國迺圖強。厥維斯報。金玉之章。風行一紙。名震南洋。如椽彩筆。持論堂皇。登高振臂。引導羣盲。喚醒僑衆。推揚國光。

闡明真理。教育用昌。提倡實業。刷新工商。風聲所樹。遐聽遐方。當茲周歲。旭日初長。何以表願。永作津梁。

題林謀盛烈士像贊二首

於戲使君。矢志不分。貞忠守節。壯建殊勳。血濺孤島。勇冠三軍。仁而愛士。智掃寇氛。殲仇殺敵。挽救人羣。奔馳戎馬。籌策益勤。不辭勞悴。玉石俱焚。頓思舊雨。企盼停雲。

名留青史。氣塞乾坤。孝子錫類。民望彌敦。偉言懿行。安能重論。見危受命。圖報國恩。悠然長逝。何處招魂。巍峨華表。惟君獨尊。彩霞遙映。奚日歸旂。德聲遐播。與天長存。

五一自誄

嗚呼孫子。沉悶欲死。應世無能。深堪自鄙。悵望江浦。狂風暴雨。瀟灑淒其。情哀益苦。舉頭問天。默然莫撫。俯首問淵。飄蕩無主。隨艸委塵。孰携吾女。無家可歸。巢覆安處。卅載飄零。那堪回首。歷盡艱辛。深愧師友。美彼綠波。祇求速朽。苟且偷生。實難忍受。羈懷鬱結。血湧眉攢。棟摧瓦折。寧希重完。顧斯身世。尤益心酸。詩吟盈篋。恨抱萬端。有人背我。播種惡根。父兮母兮。何不吾援。方寸已亂。愁思彌繁。性乖命舛。奚必多言。四顧塵寰。無可爲歡。

俗緣已了。樂與盤桓。水聲潺湲。難訴吾冤。何時永別。以友屈原。

祭成君爲臬文詞六十言

溯當暴寇。浩蕩南侵。遑遑民衆。無不戒心。吾携吾眷。避鋒峇來。與子相識。快何如哉。晨夕過訪。欣同一家。方期聚首。歡樂無涯。豈知吾妻。因勞擣疾。病榻纏綿。竟將命革。零丁六鶴。無家可依。隻身流落。涕泗沾衣。聞君有疾。本擬馳視。卒因事牽。末克動履。安知暫別。今竟長辭。飛來噩耗。雙淚交垂。弱者健在。強者萎靡。福躬不錫。天道如斯。妻少子幼。增吾悲哀。何日携我。共赴夜臺。入地無門。從何見君。憑穴哀哭。忝饗三樽。吾病復發。在世無多。願隨子後。同憩高歌。我應先歸。讓子奮飛。孰知我滯。反懷令威。入殮弗臨。情乖殊深。撫爾子女。淚更沾襟。汝其知耶。應來告我。汝若罔聞。永安爾所。薄酒再奠。北望招魂。仰希鑒納。不盡所言。

記傭婦某歸來省我賦此道感

嗟彼女傭。心誠義矣。我忘爾名。復忘爾氏。憶汝戰前。助予家事。後之吉隆。棄星遠避。歷亂三年。聞汝遇害。何期今朝。依然健泰。敦敦詢予。欲來青睞。未識我門。緣慳會礙。我已無家。心緒如麻。兒女分散。宛同散沙。勞汝跋涉。足胝淚斜。汝來顧我。心感無涯。我今告汝。爾之女主。因勞乏醫。淹然作古。

留遺二女。使我受苦。女長待婚。男庸且魯。相率背我。輸汝多情。汝心惘惘。使我愛生。親而疎遠。心恨難平。疎而勲擊。神怡色清。

題佛像

何物是佛。惟心是佛。心而弗慈。雖佛非佛。心而有慈。無佛亦佛。佛之爲佛。慈而爲佛。爾心如何。是佛非佛。

自編詩稿感賦

豹死赫奕。斐然留文。人亡闕寂。骨朽無聞。竊媿走獸。慚愧心酸。因茲耿耿。良可慨歎。我口能言。鬱而弗宣。我手能書。向誰以傳。它年淹忽。人物俱捐。私心感感。時時慮焉。欲付諸弟。性難相投。欲遺諸子。鄙而寡謀。欲托諸朋。阿誰可受。不如自編。赧顏獻醜。彙纂既成。擅自爲宰。我言雖乖。亦有可採。留遺相知。當作說海。敢累梨傳。增吾心駭。

爲公會祭清康熙宗伯文

嗟我孫公。譜出銀同。壯歲南渡。破浪乘風。性情和靄。舉族欽崇。經營商業。人傑之雄。治家有道。持儉以躬。教子成器。如駿如驤。熱心公益。遐邇霑同。贊襄吾會。尤篤彌豐。正期聚首。領誨靡窮。胡知一疾。捨我而終。善人不祿。詬彼蒼穹。思益悲惻。鬱結私衷。幽明異路。何日能通。聊供薄腆。庶納三虛。

題丘菽園先生壽菊圖

百卉凋殘後。黃花獨向榮。孤標高自潔。逸韻逞奇英。不有凌霜節。安得千載名。陶公長已矣。誰復識幽貞。惟有菽園子。風流獨自清。繪圖留遺跡。賦詠頌長庚。良友聯佳會。清樽共細評。愧予無妙筆。欲和不成聲。但願花常好。高歌醉太平。

懷二弟饒廈門

同胞只三人。東西又分手。我來蠻夷中。三弟同我走。敝宅有田園。荒穢無人守。形影猶一身。親親尙何有。三弟時相見。依人寄餬口。時來過我廬。顧我如訪友。我已結婚姻。弟弟曾知否。秋間抱一女。今纔四月久。嘆息風塵路。囊空眞見醜。蠻中苦炎熱。勉強難消受。思鄉萬里道。遙遙如北斗。良辰憶弟弟。何日共樽酒。

述懷

天心無偏異。普愛一同仁。萬物皆欣得。胡予獨不辰。八齡母見背。饑凍復艱辛。舉火無僮應。寄炊依戚親。十三父棄世。家道更沉淪。弟兄泣孤影。零丁安托身。至親雖有伯。謀夕不謀晨。幸賴諸堂叔。垂憐救苦貧。弟兄各一所。骨肉如胡秦。推食十餘載。至今得成人。數年天海客。雄志莫由伸。素願成空影。埋

頭竄巨濱。不圖有此日。南國訂良姻。回憶前時事。感之輒傷神。每思菽水奉。俯首淚沾巾。懷德敢忘報。悠悠在何春。

哀廿四叔母詞二十四韻

噩耗傳來日。天涯涕淚垂。詎意暫相別。今竟永別離。奈何以女故。忍將性命犧。纏綿竟不起。終與世長辭。諸弟年尙稚。端賴母扶持。安可遽瞑目。呱呱孰哺飢。有姪真忘義。拆產自分炊。莫念劬勞苦。反重慈母悲。門祚忽冷落。家政仗誰維。骨肉皆星散。寄食依諸姨。母病弗侍側。母歿罔知時。電夢不臨視。愛我欲何資。回憶前聚首。晨夕共追隨。愛吾情獨厚。此心終不移。嗟予遠行役。海角久棲遲。未能菽水奉。深慚愧寸私。賢母真懿行。教育有良規。四德俱兼備。慷慨尤好施。勿謂女巾幗。才調冠鬚眉。人言應錫祿。天道竟如斯。曩者未南渡。猶得見丰姿。它年一歸去。何處瞻容儀。黃泉長路隔。永無重面期。仙鶴不復返。望雲更愁思。

四求歌四首

布衣亦溫輭。何必復它求。不見晏嬰者。十冬惟一裘。捉襟未肘見。被褐亦何羞。但求能蔽體。奚須執與綢。不應因一飽。勞勞爲口謀。三餐無梁肉。未始不下喉。蔬膳甘充腹。遠勝千珍饈。

。但求安瓢食。追與古人遊。

燕居能適意。陋巷亦何憂。敝廬雖促膝。應接盡名流。莫愁有漉濕。歲時略葺修。

。但求禦風雨。何必羨高樓。

大車駕駟馬。未必安步幽。天生付我足。矯捷復輕柔。朝發崑崙去。暮歸隴海頭。

。但求脚常健。奔馳似紫騮。

嫁女歌爲隣婦作

歐風和美雨。澎湃若飛泉。博得羣男女。醉心自由權。婚姻倡自主。親長不敢專。

。世俗競相尙。禮教盡泯然。不看隣家女。私心愛少年。棄遺老祖母。絕不稍哀憐。

。安知汝慈母。當時失所天。依倚汝祖膝。才免爲碎捐。汝母能孝行。朝夕奉椿萱。

。未嘗稍懈怠。殷勤更日虔。何爲欲爾爾。實爲汝所牽。寸心惟望汝。它日得良緣。

。誰供汝書費。全恃手工錢。忍饑不忍食。爲汝買花鈿。教育十餘載。情愛不稍偏。

。奈何成羽翼。一去不流連。結局竟如此。應是母命愆。苟能念祖母。母心何惻焉。

。鐵石猶可轉。汝心何爾堅。長使爲人母。傷心血淚漣。

漫吟

求生不長生。怕死偏要死。生也如可求。世皆老頭子。死也如可逃。誰人不歡喜。

。不看萬古人。至今皆形毀。惟有古遺書。使人誦未已。生死亦何關。此中有玄

理。爲學須及時。朝夕勤伏几。苟得學成名。文章繼班史。優遊過殘年。雖賢固已鄙。君子善自持。在此不在彼。

兩脚

兩脚如車輪。日出長展轉。何不暫息機。停肩息殘喘。世塗盡險巇。行行路愈遠。及至行到日。吾身已不返。

詠榴槿

衆口各殊味。我獨愛榴槿。百果非所好。惟此最有緣。十年爲汝故。海角長流連。幾回欲歸去。躊躇復遷延。酷愛宛如命。不惜千金錢。口啖心歡喜。那管妻笑顛。未忍遽分手。長願滯南天。可憐貪嘴者。何日卜歸田。

南中歌

南中無寒暑。四時俱咸宜。衣裳免多著。輕飄似穿絲。高樓臨海渚。好風相向吹。憑欄小遊憩。終日無愁眉。飯後渾無事。信步任所之。興來思一醉。呼兒洗玉卮。工作有時倦。香煙啣一枝。精神長奮發。心力不知疲。偶然意有得。信脚任驅馳。閑遊無定息。山林與水湄。事務雖忙碌。常伴羣兒嬉。歸來對妻子。萬慮盡忘遺。蘸毫揮一紙。筆走如蛟螭。興盡卽酣睡。醒後復觀詩。一朝忙不了。心勞亦怡怡。幾忘天海客。十年長流離。

醉歌吟

人生如作夢。倏爾忽卅春。倘得重來日。我骨已灰塵。萬事不看破。徒爲自苦辛。奈何長碌碌。祇是爲柴薪。同心人已杳。誰復共清貧。絃斷再續。情愛未深純。寸衷時鬱抑。孰爲解笑顰。乃知世間事。有果必有因。回頭顧妻子。歿後卽歸人。斯時繞我膝。不過暫相親。豈值好紙筆。沒齒尙隨身。念此情難遣。酩然醉一巡。

寶刀吟

吾有一壺酒。欲以澆吾愁。吾有一金刀。欲以刃吾仇。酒已傾壺飲。未能消吾愁。刀亦頻揮舞。未能誅吾仇。仇者恨已深。愁者更難禁。試問吾與子。何以慰此心。

題戰後述某氏母家書之後云云

萬里得鄉書。行行是何語。草草告平安。無米可下釜。頻催覆寸蕪。勿再事躊躇。數年遭兵燹。身上無完襦。一家七八口。朝朝饑寒吼。破榻倚頽垣。汝心憂惻否。米珠日騰貴。桷折當焚柴。腹餒衣單薄。風吹骨欲麻。豈知遊子意。忍將予拋棄。未念前翼雛。愛惜心備至。爾今寧忘懷。爲母劇可哀。纍纍負人債。逃避竟無臺。租催尤更急。長使雙袖濕。若再緩救拯。人鬼同悲泣。歷歷訴愁腸。聞